



田坵講話

重陽過撤，年斯漸漸行人尾聲咧，燥絲絲个秋風，一陣接一陣吹過黃臘臘个禾田，日頭下該金色个浪花，跔風跳舞，錫來臨暗个日頭，搵浴在這片金色个海肚。風溜溜，在恬靜个莊下放勢打潑賴，暗分个日頭絲，還係金皙皙，兩儕湊緊，斯在這片黃金平洋項，盡命種舫斗搞园人尋，飽米个禾串頭沉沉，分厥等搵都硬硬會斷截，頭那晃去乜快愛喊毋敢咧。

割禾哩啲，吵人个機械聲，嚇走田肚絡食个瓦雀，無結煞个厥等，歸陣比比企在半天高个電線上背，細細个頭那毋會安生，不時幹過來幹過去，目珠也跔頭那睺來睺去，尖尖个觜斯吱吱喳喳啞無停，目神肚有驚心，聲調肚有不滿。該行啊過，斯將拂頭个禾串，總掃入肚屎肚个大東西，毋單淨吵耳，還過齧察到得人惱，半頭穀串都無伸，恁著竇項不管時都嘴擊擊个細鳥子，這兜做人爺哀濟个鳥，著急著命，跳上跳落，這種驚怕自家細鳥子會枵著个心態，眾生共樣。機械、農藥……，原且使得輕可絡食个事頭，這下緊來緊難哩啲，該代代相傳个絡食方式，過時咧，生命還係愛延續，仰結煞呢？人類曾使毋得同大自然和平相處？這兜鳥，較恁都無解。

好得，這恁久來有一陣後生人，陸續轉去老屋田坵耕種，講麼个採用自然耕種法來耕田打林。所有耕作過程，做下無用著徑鼻个農藥，連草都任在佢生，用接近原始个方式，來對待腳下个土地。泥肉接受著這善意个訊息，佢開始呼吸，筋脈个停動牽線到老頭擺，敏感个小動物，係上天盡單純个子兒，連著這條生命訊號咧，斯開始蠕蠕動。蟲蟻鬆泥，蝶來生卵，草竇躍上躍落个，係好唱歌个唧唧蟲。知名个鳥、毋知名个鳥，乜做下目瞋瞋掌核這坵地土，大自然个食物鏈，恬恬在這位寬寬運轉、循環。這同大自然共線路个田坵，所種出來个東西雖然媠，毋過特別香，特別甜，盡重要个係，安全百分百。這對注重養生个現下人來講，係優先考慮个食材喔。

毋過，分僇等先輩恁毋通个係，明明斯上天賜分僇人，簡簡單單免致肚飢个食雜，做麼僇人愛費恁多心神，行恁多彎彎幹幹个徑腳路，臨尾正又過貶倒轉來行前人个路呢？

作者：劉玉蕉

☆詞彙學習☆

- | | |
|----------------------------|--------------------------------------|
| 【搵浴】vun` rhog`：躺入、浸入。 | 【驚心】giang+ sim+：警覺心。 |
| 【金皙皙】gim+ si` si`：亮光閃爍。 | 【著急著命】chog` gib` chog` miang`：急得不得了。 |
| 【飽米】bau` mi`：穀粒精實飽滿。 | 【徑鼻】gang` pi`：刺鼻。 |
| 【晃去】gong` ki+：搖晃得。 | 【任在】rhim` cai`：任由。。 |
| 【比比企】be` be` ki+：整排整齊的站立著。 | 【食雜】shid` cab`：食物的總稱。 |
| 【啞無停】giab` mo` tin`：說個不停。 | 【徑腳路】gang` giog` lu`：羈絆自己的方式。 |
| 【不管時】bud` guan` shi`：任何時刻。 | |